

Beirniadaeth Cystadleuaeth Gwaith Cartref 391 – Bl10 a dan 25 oed

Beirniad – Heulwen Davies

Y dasg oedd mynd ati i greu deunydd ar gyfer gweblatfform megis gwefan neu flog sy'n cynnwys amrywiaeth o ffurfiau llenyddol. Does dim dwywaith bod y cystadleuydd hwn wedi cyflawni'r briff ac wedi gwneud ymdrech arbennig i gyflwyno gwefan gynhwysfawr ac amrywiol ar bwnc difyr a phwysig.

Ein Byd Yfory yw thema'r wefan hon ac mae'n cyflwyno cylchgrawn digidol am y byd o'n cwmpas ni. Mae'n cyflwyno amrywiaeth eang o erthyglau ac wedi creu adrannau penodol i gyflwyno'r cynnwys mewn modd clir sy'n hawdd ei ddarganfod.

Mae'r erthygl am y 'Plastigion Peryglus' yn addysgol ac yn cyflwyno gwybodaeth a ffeithiau cyfredol mewn modd bachog. Mae'n amlwg bod cryn dipyn o ymchwil wedi ei wneud yma er mwyn sicrhau bod y cylchgrawn yn gyfredol, ac mae hynny'n hollbwysig ar blatfformau digidol fel hyn. Da iawn.

Defnyddir amrywiaeth gwych o ffurfiau llenyddol o'r ffeithiol i'r cerddi, o daflenni gwybodaeth yn llawn ystadegau a graffiau i flog, cyfweiliad a mwy. Mae'r amrywiaeth yn cadw sylw'r defnyddiwr ac yn sicrhau eich bod eisiau parhau i bori trwy'r cynnwys. Yn y byd digidol mae hyn yn hollbwysig gan ei bod hi mor hawdd i'r darllenydd adael y 'cylchgrawn' ar ol ychydig frawddegau a mynd ati i chwilio am gynnwys arall arlein, ond mae'r cystadleuydd hwn wedi creu'r fath amrywiaeth difyr fel nad oeddwn eisiau gadael, roeddwn eisiau parhau i bori trwy'r cynnwys – gwych!

Mae'r gwaith dylunio yn arbennig o dda yn y cylchgrawn, ac mae ymdrech dda iawn i gyfuno graffeg, ffotograffiaeth, fideo a thestun. Yr unig newid fyswn i'n ei awgrymu yw'r dudalen flaen ble mae'r teitl gwyn yn ymgolli i ddelwedd gwyn yn y cefndir, mae'n bwysig sicrhau bod y testun ddim yn mynd ar goll ar draul y delweddau.

Rhaid llongyfarch Tafodau Tawe ar yr holl waith ymchwil, y cynnwys, y ddelwedd a'r cyflwyniad. Mae wedi meddwl am bob elfen o'r cylchgrawn yn fanwl a chynllunio'r adrannau mewn modd difyr a chelfydd ac wedi cofio pwysigrwydd rhoi linc i ffynhonnellau a chyfrifon cymdeithasol. Gwaith ardderchog sy'n llawn haeddu'r wobwr gyntaf. Gobeithio bydd cyfle i weld mwy o gynnwys gan Ein Byd Yfory – rydw i wedi dysgu llawer ac wedi mwynhau pori trwy'r cynnwys yn fawr iawn.